

CEDE Aruba a cera convenio cu gobierno y Samenwerkende Fondsen



ORANJESTAD - Ayera CEDE Aruba a cera convenio cu gobiernu di Aruba y Samenwerkende Fondsen. Esaki tabata un dia historico pa CEDE Aruba y tur e fundacionnan cu ta trece iniciativa nobo ariba tereno social.

Riba e dia historico aki CEDE Aruba ta consolida e cooperacion cu gobiernu di Aruba y cu Samenwerkende fondsen Caribisch Deel van het Koninkrijk di Hulanda na bienestar di nos fundacionnan y pueblo di Aruba en general. Cu e convenio aki, gobiernu ta percura cu CEDE Aruba, despues di un debito evaluacion, por aloca e fondonan na fundacionnan cu tin proyectonan pa fortifica bienestar di nos hendenan riba tereno social.

Gobierno ta reconoce e papel importante cu iniciativa priva tin den desaroyo di

sector social den nos comunidad. Sin e esfuersonan y logronan di e gran cantidad di fundacionnan cu ta traha incansabel riba e tereno social riba nos isla, Aruba lo no ta caminda nos ta awe. Esaki ta segun e comunicado cu nos a ricibi.

Aunke Aruba ainda tin masha hopi reto ariba tereno social, fundacionnan diariamente ta contribui na ayudo y actividadnan pa nos graninan, pa nos muchanan, mayornan y personanan cu limitacion. Fundacionnan a tuma iniciativa pa lanta internaat, ayudo pa victimanan di violencia, ayudo pa mamanan jong, screening y sosten na famianan vulnerabel, cuidu di baby y anciano na cas, rehabilitacion di hende cu adiccion, actividadnan recreativo y deportivo den barío y hopi mas. Hopi di e iniciativanan a cuminsa y a ser haci posibel dor di fondonan di CEDE

Aruba y Samenwerkende Fondsen.

Samenwerkende Fondsen, ta traha na bienestar di henter Reino, tambe ta forma parti di e convenio y ta consolida e cooperacion cu CEDE Aruba. Samenwerkende Fondsen ta consisti di 6 fondo Hulandes: Kansfonds, Oranje Fonds, Stichting Kinderpostzegels, Fonds Sluyterman van Loo, Innovatiefonds Zorgverzekeraars y Roomsche Catholiek Oude Armen Kantoor (RCOAK). Pa cada 1 florin cu CEDE Aruba ta hinca den un proyecto cu a ser aproba, Samenwerkende Fondsen na su turno ta pone 1 of mas florin despues cu nan tambe duna nan aprobacion na e proyecto segun nan maneho. Asina ambos partido ta contribui na bienestar di nos isla y ta reconoce e conocimiento y experiencia cu CEDE Aruba a desaroya durante tur e añanan.

CEDE Aruba ta un fondo di desaroyo cu ta existi for di 1980. Akinan ta desea di duna un reconocimiento especial na Jan Meelis, fundador di CEDE Aruba. Durante e prome 20 aña di su existencia, CEDE Aruba a ricibi fondonan di gobiernu Hulandes. Den e periodo di 2001 te cu 2010, CEDE Aruba a cuminsa ricibi fondo pa medio di Fondo di Desaroyo di Aruba, a base di un acuerdo entre e gobiernonan di Aruba y Hulanda. Desde 2011, gobiernu di Aruba a sigui percura pa financiamiento di CEDE Aruba. CEDE Aruba y Samenwerkende Fondsen ta contribui cu un promedio di 2,8 miyon florin na proyectonan den nos comunidad y e montante aki lo sigui crece. Cu e convenio nobo aki, e cooperacion a haya un perspectiva nobo.

E convenio cu a ser firma ta

regla e contribucion financiero di gobiernu y Samenwerkende Fondsen na iniciativa priva traves di CEDE Aruba y e responsabilidanan di CEDE Aruba, cu ta entre otro: un bon gobernacion, un bon administracion financiero y un posicion independiente di politica, religion y interes comercial. E protocol ta valido pa un periodo di 5 aña. E firmamento di e convenio a tuma lugar dor di e miembronan di directiva di CEDE Aruba y Gobiernu di Aruba, representa pa Minister di Asunto Social y Labor, Sr. Glenbert Croes y Minister di Finanzas, Economia y Cultura ad interim, Sra. mr. Evelynne Wever-Croes y Samenwerkende Fondsen, representa pa Sra. Drs. Henriette Hulsebosch y Sr. Drs. Peter Douwes.

Directiva di CEDE Aruba ta gradici Gobiernu di Aruba y Samenwerkende Fondsen pa nan confiansa y cooperacion durante tur e añanan y cu a haci posibel pa realisa e etapa nobo aki na vanguardia di sector social. E directiva di CEDE Aruba ta consisti di Sr. Amy Lasten (presidente), Sr. Leonardo Reyes (tesorero), Sra. Merl- Serrant-Gibbs (secretaria saliente), Sra. Georgine Arends (tesorero saliente), Sra. Estella Brown-Thode (miembro), Sra. Sheila van Veen (miembro), Sr. Fredis Refunjol (miembro) y Sr. Igar Reyes (miembro). Bureau di CEDE Aruba tabata representa pa Sr. Daniel Tecklenborg (Director) y Sr. Bryan Krosendijk (Coordinador di Proyecto). Tambe tabata presente Sra. Diet-Booi Staring (prome director di CEDE Aruba).

